

# Ezhisemagak Miigaajigewin aan dash ge-izhi-gibitinamamban

## Gaawin gi-michi-bezhigosii.

Daabishkoo e-michi-bezhigod inendam ako awe gagwaadagi'ind. Gaawin dash iwe izhisesinon. Miziwe izhisewag owe e-gagwaadagi'indwaa awiyag, aaniindi go awenenag igo, gaawin wiin eta gaa-gidimaagiziwaad iwe izhisesiiwag.

### EZHISEMAGAG GAGWAADAGI'IWEGIN



## Gikenjigaadeg iwe gaa-izhiseg miigaajige-win gi-ga-onji-gibitinaan giin.

Gaawin wiin bizhishig miigaajigesii awe gagwaadagi'iwed. Aayaakam iwe doodam. Niiwinoon ini ge-izhi-gikendaagozid awe e-wii-miigaajiged ngwana.

### Maajii-nishkendang:

- Gegoo nishki'igod daabishkoo gii-wanitood odanokiwiin maagizhaa gaye gii-odisigod ge-diba'ang, amii ge-onji-maajigidaazod. Amii e-maajii-gagwaada-gi-aad owiiji-waaganan, e-maji-inaapinemaad, e-anaamenimaad, anishaa dash igo.
- Amii ezhi-gagwe-wawaangawi'aad owiijiwaaganan awe gagwaadagi'ind, ji-miigaanigosig.
- Biinish ani-ziindendaagwan imaa daawining, e-gagwe-manaa-nishki'ind awe gagwe-igidaazod.

### Ezhi-bashkigidaazod awe gaa-miigaajiged:

- Apii gii-baashkigidaazod awe, amii ezhi-giikaamaad owiijiwaaganan e-miigaanaad e-oditinaad.
- Maagizhaa aabiding izhise gemaa moozhag.
- Onjida iwe doodam awe gagwaadagi'ind, gaawin wiin anishaa iwe izhisesinon. E-wii-gagwaadagi'aad, e-wii-gagwe-badagonaad awiyag wenji-doodang.

### Daabishkoo e-debwed iwe gii-onji-doodang:

- Bakaan awi'ya' odanaamenimaa' iwe gii-doodang maagizhaa gaye gaawin gichi-gegoo iwe ikido.
- Amii dash owe gagwaadagi'ind ezhi-maajii-debwetawaad gaa-ikidonid.

### Minwaadiziikaazo awe:

- Apii dash gii-maajii-debwetang awe gagwaadagi'ind, amii gagwaadagi'indwaa awiyag igi ezhi-gagwe-minwaajidiwaad daabishkoo e-minoseg gakina gegoo. Geyaabi dash gagwaadagi'ind awe gagwe-igidaazod, giishpin maajii-dazhinjigaadesinog iweni o-miigaajigewin.

### AMII MIINAWAA EZHI-MAAJISEG MIIGA AJIGEWIN. Gaawin da-ani-minosesinon, Nawach da-maanzhise. Ji-wiiji'igooyeg eta da-minose.

Ginwenzh owe daa-inakamigan. Biinish awashime ani-doodam awe gagwaadagi'ind. Biinish wiinge odani-gichi-doodawaan ini gagwaadagi'aad.

Amii awe gagwaadagi'ind gaawin odani-ganoon asii' odinawemaagana'. Dabasenimo, maagizhaa gaye odoonji'igoon owiijiwaaganan ji-ganoonaasig. Nawach gaye odani-zanagendan ji-waabamaad odinawemaagana' gaye ogete-wiijiwaagana'. Amii eta ini gagwaadagi'igod e-apanimaad, gaawin wiin bakaan awiyag ji-apanimaad ji-wiiji'igod.

## Dinookaaniiwid awe gaa-gagwaadagi'iwed:

- Gechinaa gii-gagwaadagi'aa gii-abinoojiiwid, gemaa o-gii-waabandaan iwe dino
- Wiinge ondendamoshki. Gidanaamenimig bakaan inini e-giimooji-wiijiiwad, gemaa gi-wiijikwemag gaye gidinawe-maaganag giniijaanisag odoondenimaa'
- Okewigidaazo. Wegonen igo onji-baashkigidaazo
- Bakaan awiyan odanaamenimaan. Gaawiin wiin wiikaa ji-ikidod wiin e-gii-maajitood gii-giikaawidang
- Gii-miigaajged, gaawiin iwe gichi-gegoo nitaa-ikido, maagizhaa gaye gaawiin o-gii-doodanziin daa-ikido
- Minikwewin gaye odanaamendaan gegoo gii-doodang
- Memeshkwach minwaadizi, gaye e-gichi-nishkaadizid. Wiinge o-gaadoon iwe gaa-inaadizid
- Wiin odinwaadaan aaniin ge-izhi-bimaadizid ikwe, inini
- Ngoding gaye bakaan gii-onji-dakonigaazo gii-maji-doodang
- Gagwe-zegi'iwe, gagwe-zegitaagozi
- Gi-gagwe-gibitinig ji-waabamadwaa gidinawemaaganag gaye giwiijiiwaaganag, gaye ji-anokiyyin, gi-ando-gikino'amaagoziyyin
- Gi-gagwe-dibenimig, e-wiindamaag aaniin ge-doodaman, aaniin ge-inendaman
- Gi-giikaamig, noojigo gidinaapinemig, gaye iwe gaa-doodaman gaawiin gwayak iwe gidinik i
- Ishkwaa-baashkigidaazod, ngoding mawi, amii dash ekidod e-minjinawezid iwe gii-doodang. Ajina eta iwe inendam, gaawiin dash nisidotanzii gaa-onji-zegiziyin
- Gii-maajii-miigaajged, bezhigwan ako izhichige. Aanind o-bakitewaan odikweman owadengong, aanind gaye aandi ge-izhi-naagwasinog gaa-gii-inaganaamaad

## Inendam na ji-aanji-bimaadizid gi-wiigiiwaagan? Gagwejindizon...

- Wiikaa na wiin anaamenindizo gii-ishkwaa-miigaanig, gaawiin giin e-anaamenimig?
- O-waabandaan na ezhichigemaganinig omiigaajgewin, gaawiin wiin eta gii-onji-giba'ond giba'odiiwigamigong, gaye gii-odaapinind? Zanaganini ji-waabandamowaad aaniin e-izhi-maanshakamigiziswaad gii-miigaajgewaad.
- Ogikendaan na aaniin ezhi-maji-doodawig gii-miigaanig, aaniin dash enishkaagoyin? Ginwenzh naanaagadawendamowin owe.
- Gi-bizindaag na, maagizhaa gaye nawach gi-nishki'aa, e-biibaagimig, noojigo e-inaapinemig?
- Ngoding na bakaan izhaa gii-maajii-nishkaadizid ji-onji-gagwe-gibitinang onishkaadiziwon?
- Giin na ako gidanaamenimig iwe gii-inaadizid, daabishkoo giin gaa-onji-inaadizid?

Gi-giimooji-gosaa na gi-wiijiiwaagan? Gi-minwendaan na ewiijiiwad, gi-zoongenim na? Gi-jiikendam na?

Giiyaabi gegoo wii-gikendaman izhi-giigidon:  
Manitoba Dibaakoniwewin  
Gaa-gagwaadagi'indwaa gaa-izhi-wiiji'indwaa

Wiinibiigong: 945-6851

**Gaa memwaach ji-diba'igeyin: 1-866-484-2846**

Gaawiin memwaach ji-diba'igeyin izhi-giigidoyin miigaanig gi-wiidigemaagan (**Bigo apii**) **1-877-977-0007**